

四庫全書

集部

欽定四庫全書

集部
康齋集卷七

詳校官編修_臣李堯棟

中書_臣劉源溥覆勘

總校官知縣_臣繆琪

校對官學正_臣蔡必昌

謄錄監生_臣桑英

欽定四庫全書

康齋集卷七

明 吳與弼 撰

詩

甲申元旦

列炬蕭蕭宿雨鳴
開軒冉冉曉雲晴
新春又拜唐虞化
舊學重煬孔孟情

題慈訓堂

剩採隋和詠斷機洛陽芳躅

指程子之母

孰同歸奉盈執玉

今猶昔姓字宜垂奕葉輝

贈程李二生赴京

老態偏於故舊深聯翩二妙重遙臨
春風共有朝天興
穩步青雲聽好音

即事

萬事蹉跎忝士林虛名孤負秉彝心
寒爐剩辱花封炭

進賢呂茂宰

春廩遙承皂蓋金

廣信金郡侯

秋夜懷舊

玉階金殿沐恩濃
舜日堯天不世逢
遲莫豈勝多病際
夜吟身在夢魂中

芸谷

車亨請大書芸谷以為尊公用軾之扁且請賦
焉詩曰

謀生不惜滿羸金
富買羣書子孫讀
杖藜何處可娛人
時訪芸香遍幽谷

梅月軒

鄱陽高致一軒開
雪砌霜簷月映梅
銀世杳然天似水
暗香疎影夢初回

蘭軒

羣經醲郁德惟馨
內重由來外自輕
軒即是蘭蘭即我
人誰不仰國香清

雪窠

桃李家家春滿林
伊誰一寫雪窠心
請看風急天寒夜

聽唱蒼松翠栢吟

中和齋

堂堂大本固無偏達道雖難自粹然氣質萬殊非我性
克治何惜日乾乾

饒循生辰

初度欣逢有立年兩家具慶總怡然黃柑綠橘開新薦
博帶峨冠秩此筵風俗固宜由我厚典章應只在人傳
從今日與二三子細講高堂十七篇

贈祁門四生

朱鄉遙憶舊年懷
今喜名邦四子來
寄語家山多俊秀
好將朱學勝栽培

贈孔昭

橋門北舍日相親
鄉國參商四十春
偶爾小陂風月夕
細談舊夢兩情真

宿墨池傅氏

洗墨池邊又一臨
西風重感百年心
當時弟子俱華髮

細話牀頭雪夜深

午爨白沙寺

沿道逢人問白沙
樵蘇喜達老禪家
竹林清趣微吟罷
素壁題名日未斜

宿桃昱寺

白沙已度詢桃昱
短景天寒日久斜
松竹園林清淨處
高眠都似未離家

午爨壁邪寺

停午衝泥到壁邪石壇花木又僧家清香一炷簾櫳靜
含笑揮毫向日華

宿湖溪吳氏

客舍曾留詠籃輿今息肩芝蘭多繼武金玉總怡然

燈花

吟坐久忘眠銀燈花燦然明朝風雨霽行李早言還

喜晴

風雨怯途窮疲軀歸興濃寒衾孤夢覺旭日滿窗紅

別謝步

遺編已返司成宅行李言還賤士家紅日清霜新雨後
高吟隨處看梅花

江頭叙別口占

信宿高居賸好懷江頭遠送合門來雲帆若遇東流便
更有新詩為爾裁

宿白沙寺

壁上重歌昨日詩古橋送客立多時天低又恐雲生雨

半夜疎星愜素期

書東寮壁

雲卧東寮夜寒裝北返時欲留他日跡素壁更題詩

宿北澤廟

當年歇雨暫棲遲千里琴書適楚時此日重經來問宿
雙峯對罷夜談詩

宿陳鳳鳴氏

會心境界無非樂得意軒窗即是家霜樹模糊連碧落

雲山隱約隔紅霞

石橋感興

石橋小立感懷多
借問當年事若何
不識天人相勝理
朔風淒烈漫長歌

陳傅二廣丈携酒登仙游山

勝會難逢真快哉
晴明風日共登臺
玉壺細酌題詩罷
綠水青山歸去來

留吳營元氏

花封歸轡正駸駸駐節亭前日向沉莫怪有孤投轄意
一詩聊慰遠迎心

乙酉元日

銀燭煌煌壽域開衣冠濟濟拜蓬萊寒泉細汲春窻硯
又喜微詞頌泰階

雪夜

衾裯加厚尚愆和慨彼牛衣更若何信是萬緣皆有命
達人心事漫長歌

東憲即事

積雪經旬倦出村日將名教淑諸孫疎狂每恨知非晚
性命誰人可得聞

課寶賢隆新二孫

改罷新詩課二雛鴈行端拱侍寒爐朝朝聖訓宜深服
養正工夫信在初

感興

問學無功行莫脩過情聲聞負朋游回頭難返西飛景

逐日徒增老去憂

璿慶生辰

三樂堂中朋盍簪
玉壺清話共春襟
新功更有新詩勗
克已良規各洗心

孫生景福復來接
果不肖忽七十有五而生亦六
十有五矣感思今昔遂成此句

妙手頻來奪化工
幾回笑語共春風
筋骸容易成遲莫
百歲光陰一夢中

奉陪判簿劉侯登皇華亭

萬落千村社雨晴人心天氣共和平閭閻希識花封貴
爭仰皇華嶺上亭

三月十三月下感懷

戊寅此夕月華清步月溪頭惜別情濫沐皇恩天共闊
餘齡猶幸一身輕

成化乙酉三月十三夜東門玩月有懷往事因
成此句天順戊寅此夜諸孫同乃祖母步月東

門賤子將去京時也

閣中感懷

一瞥浮生似夢過
男兒德業竟如何
回看夙志寧無感
萬事悠悠東逝波

閣夜

淡月巡簷罷虛窻
發興濃區區一何幸
生長典墳中
妹壻徐士英久逝
多病未遑致芻春
夜有懷遂成
此句

欲成哀些久慙和慘慘悲風奈若何幾度竹窻春思亂
感君氣誼負君多

書罷將就寢燈花燦然漫成此句

書罷倦忘眠銀燈花燦然道心方炯炯詩思更綿綿撫
景時雖邁謀生事貴專古人如可作日願執其鞭

哭同憲黃于珩

憶昔官居白下窻讀書同几坐同牀忍看華髮交期盡
一炷清香淚幾行

隆孫誕日賦詩為壽

十月
初二

戊寅此日次南康乙酉茲晨壽爾觴養正工夫宜百倍
勗哉高舉早升堂

寒夜偶成

自嘆生來聞道晚誰憐老去立身難塵窓不寐微吟處
霜月澄澄夜未闌

東游饒州稿

東游口占授小兒及諸生

二首

推窗已喜疎星爛隔竹猶貪缺月明
素達行雲流水趣
琴書又作小春行

一息猶存未敢閒
幾車行李又江山
逐時舊典供朝夕
隨地新詩賦往還

宿經舍渡

族里卑尊暢夙心
蓬窗僮御課新吟
虛舟到處棲身好
依舊青燈坐夜深

長山晏氏

問疾曾飛晏海詩更從羣從叙宗支他日長山疑夢處
諸生濟濟夜眠遲

章山傅氏

常憶章山吉士情

傅剛為庶吉士久逝

偶乘良便造君庭

諸子來長山迎

至其家

揮毫還慰平生誼濟美堂前好弟兄

太平寺

連日禪房晝夢濃人情物理靜時功宵來更擬尋瀟洒

淨几明窓寫訓蒙

朱子訓蒙詩

又絕句

石炭紅生夜正遲
銀燈花爛未眠時
客身無恙心虛寂
細寫閩山性命詩

喜晴

陰風號怒客心悲
添火加衣養病時
黃卷埋頭不知午
滿窗紅日又題詩

寢息偶成

人事全稀心似水
書程多暇日如年
任教大野風仍壯

漫喜寒爐火正然載渴載饑都委命時行時止一由天
小陂程課無勞計想見諸孫各勉旃

離太平寺

二首

十日禪房養性靈晴光又喜一陽生明朝何處尋梅去
特向新詩記太平

雲牋璀璨翰如飛剩載詩書使者歸共喜江頭新雨霽
重臨舴艋又囊衣

夜發龍頭山

正羨沙頭縮項鰣上流忽聽夜行船滿湖柔艣和鳴處
萬里青霄月向圓

鄱陽懷古

西風斜日次鄱城細憶當年仗義名似此男兒真罕比
徵詞何處弔芳馨

發磨刀口

問得前程去莫遲月蓬催着夢中衣湖山一覽陽應復
早向梅花賦式微

晝寢夢小兒鳴琴

勝游欲罷動歸心
晝夢時聽驥子琴
日用只知為善惡
平生不識滿籬金

獅子山

獅子磯頭一棹過
客邊心事近如何
寒更往轍知非切
暖日遺編得意多

觀語類後作

平生朱訓不離紳
舟上微言月夜親
又喜朱鄉山水近

幸哉亦是及門人

景德舟中

幾展寒衾未忍眠
殘燈旋剔又舒編
雖云甚矣吾衰也
一息猶存合勉旃

至日

閉關旅食浮梁日
歸夢寒更景德舟
天心見處從羲覓
物理窺時向邵求

晚起

道上行入繫客心
燈花忽喜照更深
寒衾睡穩歸懷好
今日良朋定盍簪

別舊生祈門謝復謝希林饒晉

今日良朋果盍簪
還家各務惜分陰
新春有約龍潭上
好與兒曹共此心

發景德鎮

十日窑頭繫客船
靜中黃卷夜忘眠
開頭正值陽來復
水色山光媚晚天

重經獅子山

陽復春來一棹還
簡編新課日希顏
船頭火伴時相命
掩卷推篷又看山

獨夜懷古

懷古心期孰與論
客邊程課自朝昏
梅花溪上春光好
一味新功勵子孫

鄱陽舟中傷九韶

時傍隣舟向日吟
天涯忽動故園心
始知一失鍾生耳

宜絕當年伯氏琴

重宿磨刀石

緣岸人家富竹林
猗猗偏稱客哦吟
若為覓得梅花伴
好結歲寒三友心

煮粥禦寒

五更炊黍候行舟
端為霜嚴風更遒
但得寸心存養熟
自然天理日周流

種湖比隣相勞

結伴歸時正快哉
娟娟新月照吟懷
慇懃更辱隣舟問
何日重過故里來

宿檐石

團團紅日欲銜山
喜得鄉人作伴還
繫纜汀沙回首處
饒河孤棹渺茫間

燈花

晴色歸程日向前
銀燈花復照遺編
兒孫接處無他喜
往復新詩三十篇

宿魚門

夢裡光陰一擲梭壯懷偏感舊游多
昂藏空有男兒志滿鬢秋霜奈若何

吳氏會景樓

東去書程日有功西歸臨眺更從容
兩間真意無窮外一點虛靈變態中

宿漸嶺

俛仰浮生一轉蓬不眠興緒月明中
茫茫盡是迷途轍

碌碌何時得反躬

贈吳璽北歸

并序

謝家步東溪吳璽字邦玉者先正文正公草廬
之族也予嘗為乃祖題東溪書舍焉成化乙酉
冬璽相予東游往復二旬慇懃備至又送至桂
林乃別裁此為贈

兩旬高誼動人多又共西歸信宿歌記得桂林分手語
龍潭春色早相過

宿打石港

讀書有益專心晚克已無功積悔多從此更加鞭策力
餘生一味致中和

即事

行李初從千里回塵窻旋掃養靈臺微言玩罷更何事
時向溪頭訪早梅

題程希善梅月

舊館多情坐夜闌清晨梅月為誰寒載瞻負荷孜孜處

玉殿承恩始拜官

輓李章

平生積學未經施玉折徒增士友悲
存順沒寧男子事晨憲慰爾五峯詩

重宿連樊橋胥氏

連樊橋畔重投裝清夜迢迢故意長
樓閣玲瓏春滿眼梅花新句賦晨憲

重宿下窑寺

暝色忙衝倦客旋寒燈又宿下窰禪憶從天上歸來日

明月清霜夜半船

饒州稿
止此

次集慶亭詩韻

偶共朋游話五峯乃知世上有英雄但憐南北雲泥迥
徒向青霄仰下風

奉寄李學士

曾向韶華惜寸陰直期心契古人心竟無定力勝塵鞅
空有虛名玷士林書為病來荒素業詩因老去倦長吟

如何黃閣仍留念白雪陽春辱遠臨

曉枕作

德性難馴學力微空憐遽瑗晚知非從今何以酬餘齒
博約須令莫暫違

寄秦叅政

淨几明窻尚友軒道情詩思共悠然春宵幾度相思夢
霽月光風各一天

小兒初度

家幸平康為樂天世遵清白矢心堅園林百果春如海
几閣羣書日似年

贈別程庸牛演

庸任雲南同知
演任贛州千戶

雲南萬里正新任贛上千山復舊官武畧共瞻中土重
文韜總喜遠隅安壺漿柳栢春風軟燈火芸窗夜雨寒
慎勿輕為兒女態功名留與後人看

下窑寺贈牛演

丙戌

晴山聯騎度花陰駐勒頻傾故舊心彼美禪關清夜宿

玉壺春酒又同斟

宿桂家洲

疾風吹浪蹴雲浮
捩柁停橈泊桂洲
巨舫得依深繫纜
孤篷高枕夜無憂

吳氏南軒

寢息隨時忘陸沉
銀箋揮罷自長吟
庭前花草宜人處
生意新霑雨露深

枕上偶成

靜夜迢迢客夢回
高吟清興正悠哉
窺窻更喜銀河爛
定有晴光燭九垓

重宿九蓮寺

曾寓禪房十日居
重來不見舊時書
閒窻一榻春宵夢
細憶流年二紀餘

分枇杷絲頭柑歸種

曉露春泥劖石苔
遠分蒼翠入雲栽
靈根細沃南歸處
杖策扶兜日日來

夜興

晝寢房中應接稀
青燈夜雨獨吟時
但令心廣身長泰
不管東皋歸去遲

喜晴

極目長天宿雨收
客窗春興轉悠悠
滿庭花草同人意
流水行雲任去留

大司成顧庵先生二郎君懷珠玉下顧次韻奉酬
客窗重篤弟兄忱
竹樹交加午院深
喜極翻令清淚墮

淒風折盡百年心

曉枕

一榻平安客慮稀
夢迴春漏正遲遲
東阡西陌嬉遊處
歌枕孤吟記此詩

游園

杖策游園處乘風坐沼時
生涯從淡淡歸計任遲遲
萬事信隨遇一身當自持
熟思今古轍至善是吾師

對月

照日東升月隨緣北住人寸心元似水兩鬢任如銀得
失幾無定榮枯事有因素諳名教旨敢不日書紳

九蓮寺南軒

食罷閒來對橘花春風庭院寂無譁浮雲流水何心計
幽興饒時即是家

對竹

生涯忘旅泊出戶又斜曛雪檻沉吟久青青對此君

即事

送別禪關話別遲
舊生重誦舊吟詩
相看霜鬢空衰謝
從古深功貴及時

客夜

徐步吟苔砌
遙空對塔燈
禪局終日卧
病骨暫時輕
寵辱元無繫
詩書素有情
心隨身共止
庶以達吾生

饒氏東閣

香南山上僑居日
金鳳橋西小憩時
虛閣明窗清晝永
雲箋留字更留詩

即事

舊館欣重宿新晴愜令辰
塵紛無所繫花鳥自相親
嘉惠諸生盛清樽院主頻
素聞亨困旨貴在熟吾生

對雨書懷

形容雖老矣蹤跡任飄然
夏雨淹三市春風憶九蓮

豫章

寺名觀生時學易習靜日同禪
利用崇吾德忘機不識圓

寶應雜詩

四首

萍梗何勞計簞瓢且寓居
清心宜雨樹供病慶時蔬
自

憊多便枕神疲少近書故人頻問訊吾道近何如
隨遇安時命尋幽養性靈登臨多古意講誦有儒生所
貴知通塞尤宜適寢興當為斯是理不必計枯榮

遠近搏空翼高低接樹花曉烟香正妙新霽日初斜積
學如攻木無謀似算沙知非吾輩晚堪鄙又堪嗟

隱几焚香罷巡簷待月來客懷不落莫詩興頗悠哉處
世憐無賴為儒愧匪才先師去日遠蒙吝藉誰開

觀桐林書屋

余知州規與友琴軒李州判
勉小簡藹然故意感而有作

一箇諄諄辱受多
知君微恙少愆和
佇看勿藥來新喜
重向桐林共放歌

橙

蔥蒨亭亭愛一橙
日供清趣映簷楹
明朝回首懷萍梗
記得沉吟此際情

偶過北院

講罷殘經思已荒
徐經別院暫佻靜
來春意君知否
晝寢房櫳日正長

寢起

不堪人事日匆匆老病惟便一味慵
徙倚閒庭高枕後遙看西塔夕陽紅

重過北院

幽僻禪房又獨來
窻邊襟抱靜中開
薰風爽氣飄晴幔
綠樹濃陰轉午臺

甥館

五月初四日

端午懷甥館蒲觴兩度斟
徘徊經茂草誰共黍離情

初五日

寶應逢重午甥門憶往年形容愁裏異時序夢中遷倚
玉人何在為箕事渺然客窻吟不寐展轉曙鍾天

坐膝間看耕

出戶頻頻候月升扶筇款款看秋畊世間萬事惟勤好
只恐兒孫未我聽

新移蜜檀柑金橘皆已結寶日供清趣

蜜柑二顆逢時雨金橘盈枝更可人借問山家那有此

新年分得下窑

寺春名

飼魚

碧沼澹怡神遺編暫一伸
病軀何所事時作飼魚人

紀夢

二妙聯英清且閒高蹤那得到
柴關哦吟曉枕思君處
簷雨蕭蕭秋夢還

沼上獨坐

病眼昏花少近書時從碧沼坐
觀魚支頤細憶平生志

行止何能與道俱

自訟

平生立志在希顏逸駕那知不易攀餘生碌碌嗟何及

羞看青編凡聖關

朱子云物格知至處便是凡聖之關語類

仙遊山

訪古餘情詠綠陰金風滿徑滌煩襟靜觀萬物生意契我虛靈無事心

小憩下窰寺竹裏

嶮谷沉沉足午涼
郊枝寂寂散秋香
會心不覺孤吟久
信是閒中日月長

塔下小立候小兒輩

寢起乘風步履遲
綠陰清晝獨吟時
遙空極目青雲表
乾鵲聲聲為阿誰

題鳳橋書屋

并序

臨川饒大誠世為南塘大族
先考士榮遷五峯之金鳳橋
今為五峯人予既賦其東閣復屬筆

于西塾云

衆理森嚴盡在書朝經暮史志何如須將萬事皆依理
先聖前賢定不迂

贈余知州

昨日高談聽友琴

李州判號友琴軒

今朝細語向桐林

余有桐林書屋

幾時更遂龍潭約淨几明窗叙夙心

奉寄舊侯鶴州周使君

英辭頻辱賁荒墟逆旅曾勞枉使車閩嶠阻深龜鶴遠

時看玉佩與瓊琚

和康節清風吟

長短高詞播大篇誰知妙處在無言
微涼一動煩歎外流水桃花共杳然

夢黃季恒

別却安樂窩遠為羈旅客夢我平生人
形容宛如昔

饒貳令淡菴

解組歸來老布衾遐齡細和淡菴吟
菜根醞醋男兒事

車馬輕裘故舊心

杏林清趣為過省躬題

昨夜東風動九垓
董林生意滿根荄
欲知化育功深淺
細看嬌紅次第開

憶家

小陂晴色映佳晨
和氣融融近小春
遙想諸孫稱慶處
相看俱念客邊人

分棲鳳竹

吳氏南軒棲鳳竹雨餘膏沐帶花分明朝冉冉龍潭上
佇見千兒與萬孫

發漸嶺

寸心無怨亦無尤何處棲身不自由焉有閒情牽瑣瑣
逡巡學德是吾憂

泊周家渡

朔風微雨月朦朧周渡相將夜落篷內省祇應隨遇好
前程不必計窮通

不寐

客夢醒時宵向分
欲將行止共誰論
黃流褻味君休問
只管吾心存不存

舟中即事

紅葉連村歸興濃
黃柑帶雨更玲瓏
倚篷小立蒼茫外
詩在雲烟杳靄中

重宿下窰寺

入院閒吟對雨時
夢醒貪看月流輝
驅馳倦客西歸晚

不待雞鳴急早炊

盱江謝郡侯遣鍾掄潘玉來習鄉射禮二生歸裁
此以贈之

彌月龍潭講禮回從容行李不須催黃堂風采超今古
何處閭閻不看來

贈陳崇書教諭考績赴天官

芸閣蘭燈利斷金驪駒朝唱白頭吟恩波闊處多魚鴈
細寫歲寒松柏心

至日次杜韻

翼翼趨朝候鼓催
共瞻小往大應來
新功煅煉當思奮
夙志驍騰孰肯灰
欲見天心時訪柳
閒窺物理獨尋梅
平生几案惟書冊
談笑何曾到酒杯

曉枕作

黃卷新功日又加
愈知聖道浩無涯
長更寧忍貪高枕
爭奈昏昏兩眼花

夜枕作

一德蹉跎不易成
空憐兩鬢久星星
雪窗欹枕無眠夜
誰共新功觀我生

雪夜晚眺

寶鏡團團掛碧霄
翠屏隱隱隔平橋
回頭更會梅邊境
緩步微吟擊壤謠

即事

又出柴關踏雪晴
養心隨處抱遺經
含英咀實嘗聞命
莫向塵寰枉此生

夜枕作

脚板何曾夢孔顏
百川東逝可西還
須當痛惜桑榆日
莫把光陰當等閒

勇

驅山寨海未是勇
借問如何學日新
歛收不可歛之氣
伏檻安流勇乃貞

宿西廨彭氏

詩成頻聽曙雞聲
却喜靈臺一點明
須識宴安真鴆毒

足知憂患乃吾生

平生雅志在希顏歲晚工夫始識難但保寸心長似鐵
何妨萬水與千山

次桂家林

繫纜沙頭朋盍簪新吟兼唱舊時吟懷開不覺笑談久
總是平生鐵石心

責躬

中歲知非已過時老來空賦責躬詩一生總被虛名誤

千慮難逃實德疵無計可回前日月有功終作後男兒
戰兢盡此桑榆力衛武朝朝是我師

重宿太平寺

琴書欣有託故舊念重逢蹤跡炎涼異心期禮樂同

寒夜獨坐

夜半殘燈坐不眠孤吟霜月小寒天昏昏病眼時無恙
又託精誠向簡編

獨坐

尋得幽偏養性靈
衰年惟喜少逢迎
簡編隨意閒舒卷
盡日禪房一味清

省躬

一身衰謝渾無賴
萬事蹉跎總不能
何以激昂偷惰氣
博文約禮是餘生

觀語類為政以德章感程子而作

尤人只見無虛日
罪已何曾有實功
莫把寸心矜立雪
但專一味暮春風

喜晴

偶來知己話忘疲
撥盡寒爐別去遲
開戶忽驚晴送喜
旋添雪水寫新詩

雪夜

雪滿園林風滿軒
聖賢對語夜忘眠
新知滋味私欣處
何幸蒼蒼假我年

宿朱坊

華顛客子已還家
夜讀扁舟燈又花
料得餘生無別喜

聖經賢傳是生涯

宿沙河

夢回試省有何思
只念因循學過時
幾向平常猶易失
志當造次愈難持

次桂林夜宿江岸傅氏

避風雨

已喜琴書達桂林
却愁風雨打寒衾
漫移棲息投安處
又稱青燈夜讀心

次桂林渡宿江岸吳氏

蒼山古渡認松林
寓宿江皋舍館深
少長肅雍揮翰罷
銀燈花映讀書心

次小陂頭登陸

寒衝暝色小陂頭
烈火黃柑禮數優
歸去摩挲青玉案
獨慚鐵畫與銀鈎

曉枕作

義利須明判兩途
斬釘截鐵是嘉謨
不於生死路頭悟
何以能為大丈夫

夜枕作

四簷風雪夜漫漫今古興懷事幾般數口幸然無凍餒
羣生寧免少饑寒

夜枕作

失便宜是得便宜倚伏循環不必疑俯仰但令無愧怍
前程一聽老天為

賀彭九彰落成新居

穆卜高居諧吉兆翬飛華棟協清朝三陽交處天心泰

百福臻時瑞氣饒

讀易絕句

丁亥

消息盈虛萬不齊等閒誰識此心微
春窗燈火無言處
剛悔因仍學易遲

病後作

老來日月信無多擬向春風詠太和
局促塵窗淫雨裏
一年桃李病中過

病起游園

並游無侶又春風況復兼旬百病攻幸有餘芳晴爛熳
微吟緩步太平中

客夜

黃州橋畔閣澄澄近水遙山映晚晴高枕自知行李倦
清風明月是平生

即事

曉牧清溪課二雛從來養正在於初詠歸虛閣閒眠處
又喜新知叶聖謨

即事

浴罷歸來月滿林
又從虛閣學澄心
萬緣有命宜隨遇
不用逢人話陸沉

寢起

寢息將興日射窗
又憑吟几納微涼
乾坤闊達身心寂
信是閒中興緒長

偶題

無事時來自得亭
秋風淅淅晝陰清
尋常在世無他技

精白于天是此生

辰孫誕日

鳳閣歸來歲二更
庚辰之載汝纔生
又逢初度裁新什
祝爾詩書與日增

寧壽同日同時生

辰孫既有新詩律
寧壽那無善祝規
流俗浮情休借問
先民遺範是依歸

即事

灌罷時蔬又坐亭
游魚潑潑沼澄澄
天光雲影徘徊處
誰共當年一鑑情

卧自得亭

養病時來沼上眠
託身物外自悠然
區區為幸誠多也
隨處先師有格言

曉枕

萬事悠悠東逝波
秋風搖落興如何
曉窗寂歷無言處
獨唱蒼松翠栢歌

陳僉憲輓章

高第弟子項判府命賦

絳帳當年交有道青衿遺愛感無窮門生故吏今重見

誰共摩挲慨古風

關西楊煥然每見漢碑有門生故吏之稱輒摩挲興歎

與豫章吳生沼上亭子話舊

兩地關心久別情相招亭子話平生青藜緩步歸來好

細詠新詩對短檠

曉枕作

危者平兮易者傾聖謨宜敬不宜輕獨憐暮景無多了

篤實新功敢暫停

數日桂花香

丹桂秋香又一年老懷不必思華顛聞香隨處堪乘興
浮世升沉一聽天

沼上芙蓉花開

玩易亭中歸去遲芙蓉忽喜映清池流年自換人依舊
為已工夫日百之

次己卯歲芙蓉花詩韻

忽驚花吐興無涯
認取平安是我家
萬事不須閒着意
只應隨分閱年華

又偶成

萬緣由命不須愁
晚節蹉跎是我憂
羲畫周文同坐卧
夕陽西去水東流

偶成

富貴無心生有涯
朝昏務去是矜誇
高眠玩易微吟處
又對芙蓉滿眼花

玩月

萬事無端不繫情
讀書終日掩柴扃
金風動地頑雲散
四望青霄霽月明

候饒循

暝倚虛庭玩偶奇
紛紛涼月滿絺衣
悠然真意無言表
忽報階前客子歸

與吳貞游東陂石泉

初冬天氣已嚴霜
霽色家家穫稻忙
紅樹題詩歸步緩

不知何處是仙鄉

和田園樂

冰泮雪消舜日含哺鼓腹堯天南畝萬蓂春雨東皋千井朝烟

隆孫誕日

人生須作好男兒德業從來貴及時虛度光陰真可惜
幾時能聽老夫詩

寒夜

霜葉燒殘更寂歷寒灰撥盡獨沉吟細看隱隱雲留象
默感生生造化心

夜讀感懷

為聖為賢當日事流風餘韻後人思殘魂何以酬初志
允出名言茲在茲

閣夜

金雞已報霜天曙芸閣重歌紫陌吟

誦金臺吟稿

百歲光陰

渾似夢十年身世若為心

至日即事

化日瞳瞳照曙筵
儒衣秩秩拜鈞天
杖藜碧澗談經罷
梅柳迎春又一年

同諸孫出村觀雪景

塵窻黃卷日埋頭
時喚諸孫度雪橋
極目長村雲漸薄
幾多寒餒望青霄

即事

墻角溪頭日日來
境幽偏稱病中懷
簡編隨處微吟罷

時探梅花次第開

雪夜懷恪一輩為求糴盱江

風急天寒念遠游
唱籌何日問歸舟
四方幸喜多青眼
觀主宜人不必憂

曉窻偶成

希賢希聖事何如
頑鈍之資費琢磨
素服前言焉敢惰
但憐來日苦無多

雪夜懷堅二

時在盱江

獨憐游子未歸時
夜半無眠有所思
稚子弱妻風雪裏
孤村心事夢依依

題玉灣李大章午風亭

賤跡何勞紀名園
自足揚午風新氣象
喬木舊輝光德義
聲猷遠詩書興緒長
經過時有賦題向
鄭公鄉

立春感懷

戊子

日日潛心向伏羲
曉窻高詠立春時
梅花滿樹方驚眼
又對千紅萬紫時

擬呈趙劉二侯

衡茅衰臥正呻吟
枉沐旌麾欲降臨
稍待條風向明媚
遠從花塢候車音

劍山鄆氏淑景亭

藏世系碑

新碣峩峩結架雄
文流雖異本原同
載瞻載仰翬飛表
春在乾坤浩蕩中

藍頭書屋為新喻何琛題

新種芸香屋數椽
青山綠水映華顛
欲知自下升高處

人十能之已必千

曉枕作

二首

滿眼梅花看未飽
朱櫻處處又舒紅
一年好景休孤負
細認洋洋發育功

兩眼昏花日抱疴
書程全減睡魔多
春深何處無顏色
李白桃紅奈若何

即事

一春多病倦游嬉
又對鶯啼燕語時
疎竹短牆流水曲

衆芳深處詠歸遲

坐東門外樟樹根

脉脉春流一澗盤
新晴錦繡萬花攢
小詩留與兒孫誦
老大曾於此考槃

自得亭即事

一亭瀟灑隔紛囂
坐卧於斯興自饒
雨後落紅殷滿地
崇桃相對尚妖嬈

自得亭對雨書懷

剛恨平生學聖難
餘齡程課肯容慳
洛閩幸有階梯在
精白斯心日夜攀

題弋陽吳茂宰雙白軒

物則民彝本粲然
奈何多蔽損其天
誰憐雙白同吾意
遙賦新章更勉旃

中秋玩月次舊韻

永樂己亥庚子寓五峯甥館
正統庚申辛酉壬戌
寓種湖景泰癸酉寓安慶
天順丁丑寓呂坊

寺戊寅寓新橋驛癸未寓歙縣成化丙戌寓五
峯

戊子中秋月又圓小陂新雨淨風烟襟期美惡元由我
身世浮沉一聽天細數流光懷旅次獨醒殘夢立簷前
達生知命應須服慎勿憧憧役莫年

宿斯和嶺徐氏

青山投宿問斯和安樂真同邵氏窩幸記松楸隣貴里
雲仍奕葉假經過

奉東彭澤族里

小春新霽快行裝力病由來拜響塘

十三府君墓

寄語華宗

賢後裔先塋宜護不宜傷

宿種湖

筍輿遙自響塘歸故里歡迎逐夕暉青燈綠酒綿綿話
總念桑榆見面稀

宿羅原岡

彭澤迢迢宿種湖羅原岡上又停車夜分獨散青霄步

一點靈臺合太虛

偶成

年將八十待何為
賢有良謨聖有規
逐日孜孜無別想
幸時相賞莫相違

即事

己丑

滿園芳菲積雨摧
東陽新霽病懷開
兒扶杖策閒游處
尚有殘紅待我來

璿慶生辰

二月

良辰大壯綺筵開
細酌諸生介壽杯
珍重相觀而善處
麟經義畫養靈臺

寄嚴陵張太守

金臺高誼連三月
嚴瀨離情又六年
駐馬江干何日遂
暮雲春樹夢相牽

自得亭 二首

曉立雞聲月晝坐
綠陰風雨行名教
旨千古此心同
一塵不動處萬籟無聲時
高卧清風裏微吟自得詩

不寐

老去逾憐學聖難
日新程課敢容慳
細思夙昔無眠處
涼月紛紛五夜闌

輓豫章胡昭

璧水才華夙分深
九蓮高誼古人心
衡茅新約成春夢
何處淒涼問斷金

東軒即事

東軒高卧處
竹影亂虛簷
借問軒中事
新功細學謙

八月十四夜玩月

滿林涼月映更初
高枕虛窗玩易餘
老去倦為湖海客
年深幸託竹松居
知幾漸覺工夫密
安分寧論活計疎
企仰聖謨頻浩歎
襟期何日得純如

輓饒州吳別駕

男兒何者是英雄
德義存心任轉蓬
雖死猶生雙白志
廉頑立懦仰英風

次前巳丑暮秋拙吟以策餘齒

舊跡沉吟久新功感慨多形容空老去抱負竟如何顏
孟雖相遠路岐寧敢他先民有成憲程課日漸磨

九日次杜韻

當年謝病辭金闕此日高登在鳳臺嘉禮特蒙天使盛
客懷時向故人開

程庸

浮沉轉盼成今古寒暑驚心幾往

來萬事蹉跎空白髮餘齡程課為誰催

懷閻巡檢


承以義軒羣聖之道
見最夜拏舟伴宿

戊寅此日接吳航歷叙義軒重大方伴宿跪辭勞夢想

尺書何日達南陽

隆孫初度 十月

前日慇懃話夢蘭
茲晨喜氣藹門闌
鵬程萬里男兒事
夙夜孜孜學孔顏



康齋集卷七